

妙  
香  
齋  
詩  
集

序

自古詩人往往著作重一時不數傳而彫  
零湮散求之不可復得亦有遺文殘缺而  
子孫能世繼先志不憚蒐輯一再梨布前  
人手澤藉以流傳洵可貴已 孚民明府  
重刻其曾王父 荆園先生詩集問序於  
余 先生固循吏也牧路南時政聲卓越

守大理十年凡可以惠民者皆毅然行之  
成敗利鈍不遑自計彼都人士與吾鄉之  
宦游於滇者至今稱道弗衰意其詩當如  
穹囅邃壑崖岬嶄絕令人望而疑畏乃讀  
所著妙香齋稿溫雅和平語語自性情流  
露而出無復一豪凌厲之氣噍殺之音此  
非天資忠厚又深以學養確乎有得於中

者能若是耶夫乾嘉以來

國家承平久矣海內閒暇士大夫從容坐  
嘯以詩鳴志幾難僕數而一二傑出之才  
各標一格以相矜尚天下之從風而靡者  
爭慕效之一若不如是即不可以言詩也  
者先生生當其際獨能不為風氣所移  
自據胷臆發為詩歌於諸家門籬未肯有

所倚傍是其特立不阿之概不因人為俯  
仰又不為矜奇立異以自炫耀觀其詩抑  
可知其人已 先生既沒其子若孫都遺  
稿為四卷始曾刻於楚南不數年而燬於  
兵燹零縑斷楮存者亦僅矣昔放翁劍南  
詩稿未及手定為其子虞所編文潞公集  
已散佚少子維申復編次以傳識者避之

顧其世次未遠猶易為力至若東坡全集  
燬於靖康之亂迨其曾孫嶠補輯重刊始  
復舊觀後世得讀建安本者無不咨歎傳  
為佳話以其所為尤難也今 孚民少承  
家學能於灰燼之餘護持先集不墜奔走  
四方歷數十寒暑卒付手民俾得更行於  
世以視前賢豈多讓哉而 先生之垂教

子孫素風世濟其遺澤為何如耶翳余謏  
陋烏足以知先生重以孚民之請謹  
就鄙見所及者聊綴數語以誌景仰云爾  
賜進士出身翰林院編修記名御史陝西  
提督學政鄉後學慕榮榦頓首拜序

大理府知府荆園趙公傳

公趙氏諱德懋字建澤荆園其號也先世自明洪武初由山西洪洞遷沂州之蘭山官莊村居焉遂爲蘭山縣人公少資敏而勤學年十九以第一補府學弟子員工制舉業期以科名起家乃屢躋秋闈某科已中式以易詩兩房卷多少有差因更易竟被抽落自是以義命自安不欲試嗣以己酉選拔貢成均遂以知州謁選揀發雲南公樸直耿介不屑作世故周旋態故不爲流俗所喜而老成有道者咸加器重時路南州開厥採銅厯年苦不足額前兩任皆



以危疑去官人咸視爲畏途上憲素知公才恐不樂從事  
因婉商之公慨然曰國家事卽分內事何敢辭成敗利鈍  
有命在遂奉檄赴路南任採辦銅務或代爲公危公不顧  
也及開採銅源大旺人又視以爲利公曰吾家衣食自足  
原非爲貧而仕敢有以銅一觔走私者必置諸法故舊額  
銅三十餘萬公採辦至三百餘萬上憲嘉其廉能飛章保  
薦奉

旨送部引

見擢升大理府知府

仁宗睿皇帝

召見溫語褒獎守大理幾十年護理迤西兵備道以賑飢與上官爭幾蹈不測公怡然不爲意曰吾爲民卽去官亦榮也卒從公議嘉慶二十五年復以引

見赴都值

睿皇帝升遐公隨班入哭悲痛不能自抑由是感疾及回滇道光元年六月卒於官公性孝友有姊適王氏家中落周之備至二弟皆異母愛如同胞訓子孫嚴而有法處事公正鄉里奉爲矜式著有妙香齋詩四卷子六人長諱宗岐號晴

嵐附貢生亦工詩著有晴嵐詩鈔

論曰孚民明府兩涖吾邑仁明廉惠民愛戴如父母政事文學稱一時公之曾孫晴嵐公之孫也知其有自來矣狀公行略以傳見屬其文簡潔有法予無以易也因鈔刻爲公傳公生平政蹟當不止是然採銅一節爭賑一事已足概見其爲人况內行篤修如此古未有忠孝靡虧而不足有爲者也公之賢匪獨爲子孫者所當念修抑可以儆有位者矣明府名嘉肇咸豐壬子科舉人

欽加國子監學正銜孝廉方正 恩貢生三原賀瑞麟撰

# 原敘

龔黃無詩名李杜無吏治詩人循吏一身兼之蓋其難也夫詩至唐稱極盛而吏治漸不如古惟韋蘇州元道州輩揆張風雅吏治亦有可觀餘若郊島元白之屬或身無官守或不久於外任所至皆有聲績要而論之詩以理性情而書以道政事未有性情不理而能達於政事者卽未有政事優裕而不本之性情者聖門四教首詩可與言詩卽可與從政其後詩敘作於西河詩傳成於端木誦詩達政詩譜皆治譜也而自非仕學兩優未可輕以相許吾鄉前

南詔太守趙荆園先生早歲擢己酉拔萃科文名藉甚然  
尤留心於經世之學非特以詩名也旣而筮仕滇南牧雄  
州典大郡吏畏民懷政聲洋溢更不特以詩名也而先  
生顧好爲詩自山川游厯花月讌集室家聚散戚友往還  
性眞所至篇翰隨之而又非爭便捷矜華藻已也一字未  
妄拈髭微吟如求民瘼及其得意疾書又如下令流水之  
源而沛然莫之能禦也夫哦松賦鶴丞尉事耳官卑事簡  
坐嘯非難而先生當盤錯之交膺專城之寄衣緜蘊藉  
硯几清華寫韻樓中丹鉛在手點蒼山外翠靄凝眸治績

媲美黃而風流追李杜揆之韋蘇州元道州輩有其過之  
無不及焉所著妙香齋稿日月既多哀然成集滇之人愛  
其人並愛其詩屢請付梓而先生謙讓未遑也今先  
生既歸道山子若孫不忘手澤蒐羅遺編都爲四卷以步  
韓通家後進不鄙謫陋屬以校讐

步韓

受而讀之而歎曰

步韓

有味哉妙香齋之爲詩也質而不俚清而能腴五言各擅  
格律七絕獨標神韻庶幾乎參上乘於維摩通旃檀於彼  
岸者歟安得於靜室中日手是編時操長笛一聲共倚樓  
人細領此中真意也刻成以寄滇人滇之人不見召伯猶

見甘棠旣愛甘棠益愛甘棠之詩將所謂循吏詩人自古  
難兼者乃今於 先生遇之矣抑我輩家沂海間徐陵玉  
臺水部梅花千載風流慨焉如晤而 先生之居猶近蘭  
陵梁昭明之故里也爲問選樓餘韻尙有存焉者乎琴鶴  
有靈還以質之 先生是爲敘

道光二十有九年歲次己酉三月旣望郟城姻家愚再姪  
吳步韓小巖甫頓首拜譔

妙香齋詩集卷之一

古琅邪趙德懋荆園著

嘉翔  
同校

寫懷

懷才需濟用匡坐意何如學問經綸本文章政事餘不登  
循吏傳愧讀古人書多少彈冠侶勲名莫殿渠

中秋泊舟張家灣

含情無語對中秋細雨微風古渡頭幾曲灣環南注水連



聲欸乃北來舟繞隄漁火零星見隔岸煙嵐次第收桂影  
適當開玉鏡雄心擬向廣寒游

過德州

舟自通津發今瞻德棣城一灣河曲抱兩省界分明秋水  
清無滓鄉關望有程板橋看既啟有浮橋舟至則啟從此不留行

過臨清州

水次繁華地臨清快壯游城垣分兩岸帆影界中流炊密  
疑煙重關開識纜收憑看占利往直下濟甯州

過關歌

臨清城隈水潺湲藏風聚氣灣復灣最是上下交衝地盤  
稽奸宄出其間蕩槩搖櫓迤邐來未到津口先徘徊爭道  
此處稅務重會須濡滯莫疑猜泊艇曉日正瞳矐金烏初  
升照窗紅輕帆雖駛難飛渡一纜橫亘急流中粉脾高挂  
書分明何去何來自陳情若言囊空無多贈休隨游舫逐  
次行登岸報稅各紛紛錙銖計較縷細分國賦由來少不  
得爲關禦暴古曾聞切切私語兩相投還向艙裏事窮搜  
頤指氣使無覓處始許放關莫淹留斜日夕墜影沈沈滿  
川落葉共蕭森笑煞操楫如脫兔一聲欸乃萬里心

望東平諸山

路入東平指顧間  
羣峰矗矗豁心顏  
燕南一帶平如掌  
斗見青光擁翠鬟

早霧

波光曉色不分明  
渺渺孤舟衝霧行  
一片溟濛疑露重  
無邊繚繞覺煙輕  
寒塘乍訝迷鷗影  
空谷常留隱豹名  
當是狂風將應節  
滿川洶湧作濤聲

舟行悔遲

舟居徒曠日對景暗牽懷  
落葉浮輕浪游鳬傍水涯  
興添

憑酒助愁臧借詩排辭水須登陸鄉關計日諧

· 望寺中青松

雨打空塘霜覆橋無邊秋色望中遙繁華盡逐東流水惟有青松自後凋

自嘲

流光荏苒負青春徒被儒冠誤此身不向科名爭殿最擬將經濟報

君親操刀自昔傳誰氏製錦何須讓古人史筆千年存直道馨香姓字屬良循

思家

停杯不語計歸期  
川路漫漫多曠時  
千里魚書通遠夢  
一天雁字寫相思  
詩緣排悶成偏速  
菊爲送秋開故遲  
風葉蕭蕭寒漱冷  
煙波月影悵迷離

訪響鈴閣松山禪師

在京相約

禪門晝閉是僧家  
依岸停舟興正奢  
千里過從尋舊約  
松風竹露自煎茶

天陰

時九月廿二日遣人還家

行役登途日長天  
忽作陰川流洙泗  
水峰出嶧蒙雲霜  
重

須愁冷秋高不望霖徘徊歧路客勿使雨沾襟

風順船疾長歌

默計歸程多淹留恨煞行舟不自由昨晚行過分水口始  
從逆流入順流不料烈風兼細雨泊岸未離濟甯州閒步  
酒坊尋小飲惟將薄醉解離愁息燈理衾高臥足委心任  
運更何求斗聞銅鈺連聲響盪槳搖櫓起櫂謳披衣徬徨  
約數刻開窗眺望豁遠眸幾層樓閣連雲矗一陂蒼茫帶  
日浮來此已是南陽鎮百里那患阻且修回首煙波歷經  
處昔遲今速大不侔楫夫爲予說梗概此理何須費窮搜

君不見波靜浪平風正順兩岸蘆荻微颼颼

過南陽湖二首

勝迹行舟賞南陽舊有名流通知開啟風息見波平秋水  
連天淨澄湖到底清伊人應宛在仰止有餘情

縱目南陽畔湖光一鑑中流源同上下水不辨西東雲影  
沈沈碧斜陽漾漾紅雙崖資蓄洩濟運正無窮

風順舟夜行

中流畫舫趁風行盡日通宵莫問程漾漾晚帆微有影潒  
潒細浪靜無聲隔隄已失蘆花白近岸時看漁火明翦燭

不知更漏永一彎殘月聽雞鳴

酬同舟熊公

清議欣承稔知非百里才交情醅似醴臭味淡如梅詩自  
推敲得文從體驗來天生原有用無久負雲雷

望嶧山碑

湖中山上多居  
室微子墓在焉

渺渺煙波不斷青湖光山色兩相形經霜秋水清無滓過  
雨浮嵐翠欲停一帶樓臺迎曉日千家漁火散疎星應從  
元鳥發祥遠斷碣殘碑仰秀靈

過韓莊閘



舟逢開口遲難停一點晨光透畫櫺獨坐艙中披野史白

雲深處數峰青

運河南岸多山

舟抵臺兒莊

望斷鄉關不計旬還從渡口認前津輕舟一泊斜陽晚隔岸遙呼是故人

下船

東西分界處一望船縱橫乘舫自上下到此不須行攜李登東岸故人欵門迎揮手辭新契挑燈敘舊盟沽來紹興酒執杯好共傾問予揚帆後經今凡幾程河道紆且阻歷

歷數陰晴笑言何歡洽永無風波驚皓月當窗照街鼓報  
三更解衣不成寐輾轉對短檠無限鄉邑事迫欲知分明  
來朝須早發誰見此時情

別同舟熊公

公都中人甲榜歷  
任縣令有事揚州

旅舫劇談日幾回羞將謗陋對鴻才龔王撫字於今少班  
馬文章自昔推化雨濃霑因物付春風滿面待人來今宵  
小飲君須醉征雁一聲雲路開

早行

雞聲喔喔報清晨輾轉連宵聽倍真路熟何須愁駕早一

天星月送歸人

山行

詩情何處最相關  
霜染丹楓入望殷  
秋色春華渾莫辨  
一林紅葉滿寒山

冬日偶成

風雨憶吾廬  
歸來自埽除  
猶留豪氣在  
偶與世情疎  
雪夜三杯酒  
寒窗一卷書  
烹茶鑪火活  
閉戶樂何如

游全牛山

累累羣山貫珠來  
巋然卓立一峰開  
岡斷雲連秋色裏  
纔

人到此不徘徊村居違距二三里滿眼翠微何其邇閒步  
攀援躋絕巔蒼茫四顧入畫裏左川右湖發清澄厯落浮  
嵐象鵠峙舉首適見鴻雁飛蕭蕭去我不盈尺結伴著屐  
下東偏曲澗石磴兩蜿蜒樵夫牧童共導引爭言其中有  
異泉杯水滴漏沈石竇不竭不溢信天然探奇若遇柳子  
厚賞識早入小記篇紅葉夕霞互弄影沿崖容與對晚景  
牛山由來近齊郊林木伐盡止清冷異地同名愜素心彼  
何濯濯此森森繁華那如幽僻久小憩蔚柏蒼松陰

由朱保村赴郡城卽目

寒風烈烈半陰天偶向長途自著鞭側帽爭趨人入市晨  
炊競起戶餘煙梅芳嶺上惟孤賞鴨傍水涯祇穩眠近晚  
同雲看一色霏霏瑞雪兆豐年

贈日照董明府

崇論江都豈浪誇文章經濟屬君家澄壺滿貯三秋月靈  
雨催開滿樹花琴鶴有緣惟著作閭閻無擾祇桑麻郎官  
應宿膺

天眷仁見褒書到海涯

過晚山口

山腰通小徑按轡莫輕馳微雨新晴後斜陽落照時  
坂危車到少林暗鶴歸遲翹首鄉關遠何須悵路歧

早春漫興

甕頭新釀屬誰家曳杖聞香興自賒堪喜鄰翁邀共飲  
春風滿院落梅花

春游口號

晴日淨無煙閒游學少年春光何處是祇在柳條邊

喜楊靜涵來訪

淨几攤書日上遲履聲隱約客來時甕開新釀須嘗酒  
庭

落梅花索和詩數月睽違成隔歲十年情悵憶前期廬懸  
故榻留君臥雲樹蒼茫久繫思

送陸公再牧粵西

公名澍甘肅人前任廣西永甯州起復候補仍得是州詩以送行

粵西再至意如何萬里湖山次第過官廨無留陳案牘女  
牆猶長舊松蘿循名素著桁楊減惠澤重施雨露多仁見  
陽春來故地樂郊處處聽絃歌

聞書聲喜賦

簡編羅列發酣吟隱隱書聲柳外尋十載寒暄修士志一  
窗風雨古人心言經含咀英華出韻助悠揚意味深更有

枝頭求友鳥芳林  
嚙嚙弄清音

望六日遣人赴都

上元初度月如銀  
廣陌風吹暗起塵  
萬里歸鴻隨過客  
一隄楊柳拂征輪  
春流凍解波初綠  
細草萌抽色漸勻  
聞道洛陽烟景好  
往來多少看花人

新耕

草意含青柳未齊  
老農驅犢過山蹊  
喧言此日風光好  
向東郊看試犁

題漁洋五言短篇



松風竹露接清秋雅韻蕭蕭淡欲流江上彈琴猶作伴

王有

江上讀新城原不讓蘇州

陳評主五言短  
篇源於韋蘇州

清泉寺隋碑

東柞村  
迤西

古寺翼翼枕碧泉清流潌洄遠市廛閒步過從契幽賞雙

碑屹立苔徑邊一記開皇一仁壽隋文距今幾何年口誦

遺文手摩字龍蛇飛動相鉤連風雨剝蝕經多少製作粵

若唐以前金寒石泐半銷歇似此何以獨形全境幽路僻

人到罕陳迹雅不嫌地偏寄語住持好護惜勿使傾圮埋

雲煙

晝眠

誰說蓬壺別有天窗明几淨正陶然當前風浴堪言志異  
日經綸祇待年詩到無心偏入化幾逢極靜可參禪松陰  
滿徑神思倦且下湘簾事晝眠

看杏花

杏林春色燦朝霞閒向山村覓酒家最愛青帘遙映處隔  
牆橫露一枝花

院中海棠

遲遲日影上窗紗柳惹東風萬縷斜午夢初醒簾半捲階

前睡穩海棠花

暮春卽目

生意滿芳園春歸媚景存輕風斜燕子細雨長龍孫布穀  
農徂澤分花客踵門鶯鳴何處聽好酒正盈尊

初夏

鳴機罷織春歸早細葛成衣序不訛竹影橫簾飛燕小桐  
陰鋪徑落花多薰風拂拂潛抽麥靈雨飄飄暗長荷鳩鵲  
易巢觀物化由來首夏自清和

新晴

瞳矐曉日現初晴陰極陽來擬代更十里青蔥山隱隱一  
湖新漲水盈盈竹含宿雨眠將起鷺點清波色倍明躡屐  
谿橋閒悵望雲羅海外數峰橫

見月

浮雲乍淨月如鉤夜色澄清擬素秋階下一池新漲水流  
光落照看魚游

晚坐乘涼

納涼乘晚景啟箔坐移時竹小風來早梧深月到遲兒童  
閒進酒昆季笑聯詩陣陣清香過荷開正滿池

山行聞泉聲

源泉何混混小徑蹋雲行飛瀑緣溪轉懸流漱石鳴出山  
無俗韻入耳有餘清解履盤桓久悠然世外情

訓子

大小承歡各自如休將日月任乘除一門競秀今資汝半  
百無聞尙鑑予誼篤孔懷惟孝友謀深燕翼在詩書分甘  
娛目當前事七葉俱成古有諸

入山訪友人

茅廬來去慣祇在白雲中策蹇過溪口迎門見侍僮泉林

遺世意雞黍野人風猶記春明日桃花隔澗紅

秋風

誰教送暑並迎涼吹入蓮池散晚香獨立不知秋已到西風作意透羅裳

秋日山中雜詠四首

林煙冑復飛濺瀑流清泚一帶亂山青人行雲樹裏登高契素心秋氣西來爽踞石一長呼流泉相答響迎風疑織錦照日自成霞宿草沾新雨林開石竹花經時息倦游斗見暮雲收斜日明殘照空山一色秋

雨後晚眺

雨餘呈晚霽憑眺最移情秋水連天碧空山返照明歸雲  
微有迹還鳥寂無聲閒立橋西望霞標建赤城

聞磬

天色清澄秋意深無衣厖念發孤吟安貧最羨鄰家婦夜  
夜空階自理磬

自許

詩書託閒身佔畢未絕口終靳一科名悠悠自負久緬懷  
古循良龔黃爲稱首保障異繭絲俯仰成向友永日一局

棋寒燈三杯酒沒世而無稱天地豈我有鯤鵬六月飛騏驎  
千里走丈夫志四方原非計升斗列宿應天象俗狀適  
增醜長嘯臨西風令名期不朽

秋日閒居

閒雲幾片漸成陰一架詩書寄偶吟隔牖芭蕉經雨響當  
階苔蘚到秋深西風滿院蛩聲切白露橫空雁影沈兀坐  
蕭齋多逸趣盈條香靄桂森森

新晴赴郡城

曉色晴光入渺冥長林豐草露初零樹中藏果紅沈綠雲



外看山白腎秋水一灣環郡郭良田十里接郊坰參差  
雉堞斜陽裏翼翼城頭幾古亭

初月

最是初弦月纖纖一曲明無端驚旅雁雲外兩三聲

九日二首

登高望遠興偏長風景依依是故鄉遍插茱萸儂作首今

年喜不負重陽

去年歸家未到

何妨作賦擬雄才攜酒同臨野外臺露地黃花無管領呼

僮采取入香杯

臺距村東里許

存遺址分藩憶舊垌徘徊猶未已車馬過長亭

過鹽河

鹽水何殊汶水長行人早履板橋霜隔車遙語南征客除  
卻東阿無興梁

早行

最是長行客登車萬慮空馬嘶千里月雞唱五更風而地  
霜華白沿途燭影紅模糊續殘夢杲杲日生東

過河間府

冠蓋臨周道河間舊有名高低泥作屋

多平房  
土屋

南北水環

城門啟登瀛

南門名

早霞升亂堞明千年懷雅樂軼事最關

情

至都

九陌煙如海京華閱歲來詠梅疑有約製錦愧無才  
暫息風塵駕同傾主客杯旅齋客小憩畫角莫輕催

由提塘寄家信

塞鴻過盡楚江寒郵寄何須假羽翰千里音書無絮語  
惟將兩字報平安

擬來春南歸

金臺一望暗銷魂  
儂住琅邪下里村  
柳暗樓頭悲少婦  
草薰陌上怨王孫  
文峰日暖浮螺色  
泐水波融認穀痕  
春到故鄉多旖旎  
歸來猶理舊田園

歲暮偶成

幾點閒雲瞥眼過  
優游卒歲笑蹉跎  
世途閱歷心情淡  
日月乘除感喟多  
斗酒微醺增意氣  
篇詩乍就費吟哦  
匣中寶劍瑩秋水  
弈弈精光不用磨

早春漫興

春來何處劇堪憐  
攜杖行行思悄然  
太液池頭三徑雪  
玉

蝨橋外萬家煙平看景物開新序獨對風光憶舊年自恨  
未酬投筆志遲遲惆悵夕陽邊

思歸

周道逶迤任去留春光漸動綠楊洲歸來人負陶彭澤退  
處聊從馬少游敢薄簿書多鞅掌須知名士本風流淫詩  
癖酒當前趣數載投閒足葛裘

酒吟

攬鏡莫驚鬢華早雄心未隨春色老不薄今人愛古人班  
馬文章屈宋藻密明几淨月照臨有酒可酌詩可吟三杯

小醉清興發一曲狂歌千載心

遣興

玉泉山下池水白身在薊門正作客居庸關外曉日紅夢  
繞齊州第幾峰東風一夜春如許蒼茫千里牽別緒儂是  
東西南北人悠悠此心誰與語甕頭新渌今何如開尊未  
飲香滿廬歸去莫笑無寸進囊中富有新著書

謝如如師畫竹

偶步過禪林彷彿入嶰谷高僧耽幽閒三徑植修竹自得  
凌雲勢逸情寄尺幅大筆何淋漓揮霍無拘束如臨水猗

猗似帶風謾謾倚案共欣賞扶疎幾竿綠外直而中通亭  
亭神氣足緬懷古之人與可繼芳躅

仲春一日卽境

沈沈曙色沒長河一色陰雲瞥眼過都下風寒春較晚薊

門烟冷雪偏多

是日又微雪

吟成長短尋詩侶飲謝醕酬避酒

魔

與友同飲座多醉客

莫道長安行樂地流光荏苒易蹉跎

出京宿新店

平野風吹不覺寒連鑣同發意神寬出城斗見春光好入  
店方知行路難一榻借棲常作客三杯獨酌勉加餐善才

猶竊京師調手抱琵琶續續彈

漫河旅壁有弔文文山詩賦以和之

丞相孤忠日月新文山雅不愧成仁零丁洋裏家何在蒙  
古庭前氣自伸崇議原非爭口舌赤心眞足泣鬼神崎嶇  
北上豈無意莫道黃冠可託身

望東阿列山

列岫遙分岱一斑星星積雪滿花山燕南十日東阿道斗  
見嵐光擁翠鬟

過三歸臺遺址



三歸卜築意何爲  
佐霸功勳青史垂  
故址一堆苔四合  
花山道外看殘碑

早發望月

茅店雞聲夜未闌  
半珪高挂玉樓寒  
春來圓缺番番度  
盡在征人馬上看

望村外列山

隱隱浮嵐野外新  
驅車應笑往來頻  
寒容消盡還相待  
祇有青山不負人

妙香齋詩集卷一終

去都門已半年

遇友人

傾蓋亭邊古道荒同心相遇話偏長於今名士誰超俗自昔才人半近狂好友時時通酒債酣情處處飽詩囊班荆暫對牽離緒隄外蟬聲送夕陽

與堂姪卓東輩小宴

避暑坐草堂清陰滿嘉樹忽聞履屐聲徘徊驚起顧升階  
勤問訊盡是後生數家庭欣聚會相與展情懷尊中酒未  
空雞黍田家具故人饋河鯉鮮潔良可慕諸子導我飲几

席苔階布荷花送晚香得韻且分賦薰風自南來飄飄竹  
外度際此興不淺悠然忘他務避席忽興辭譁言日欲暮  
旣醉莫淹留遙天散月露小別應相思幾日謀再晤

過龍沂莊

偶來山蹊徑寥落十數家門縈清流澗池開碧荷花薰風  
如相引青青水之涯臨溪操瓢飲寒冽勝煎茶當午暑不  
到盤桓興偏賒此地最幽僻泉石沈煙霞忽聽采蓮曲回  
顧岸上竹香氣與翠影怡悅兩相足足音何楚然芳心滿  
空谷

月下夜行

暑意向夜靜策蹇得得行清露溼衣袂蟬噪不佳聲愛煞  
一輪月溶溶照前程

午雨

占雨何必雷與電先機還從天象驗昨晚月色暈帶紅今  
午暴注飛如箭懸瀑平翻鴛鴦瓦明珠亂點芙蓉面此雲  
應自泰嶽來觸石膚寸崇朝徧垂簾斗覺暑氣清神龍何  
處覓隱見旣雨方知晴亦佳隱隱遠山發蔥蒨

詠池中蓮花

我聞太華峰頭藕似船渺渺遠隔萬重山又聞南海波心  
荷沈水遙遙相去萬餘里階前細流暗通池彈丸種向清  
淺裏二月三月小如錢四月五月翠蓋圓六月花開雲錦  
段不染淤泥何新鮮青蒲綠竹相掩映莫誇江湖多煙景  
小院無人晚風清雨餘擎珠香正冷苔徑誰唱采蓮歌蓮  
葉田田喚奈何爲憶若耶溪上女朝朝暮暮盪舟過花嬌  
不如花淨好臨池幽賞最傾倒笑他西湖別樣紅十里風  
光迄如埽高賢勝地傳未休去年曾爲西江游蓮溪遺址  
荒城角獨向斜陽弔暮秋月夜闌干遞可倚肯將君子擬

西子世人愛蓮皆愛色千古同心茂叔耳

郭生來

生江西人精岐黃術十五年前爲季子治疹有驗重來相見甚歡賦以志之

屈指睽違歲幾更萍蹤適合續前盟回生有術肱三折驅  
白何方髮數莖人去猶懸良友榻重來無恙故人情多君  
惠贈籠中物免事深山采藥行

詠叢生榴

最是安榴不勝寒每逢積雪生意殘拱把佳樹春色闌惆  
悵東風蹙眉看逾期未見發新鮮幾株凋盡根猶蟠雨露  
潛滋日月寬萌芽茁突綠含煙同本異莖爭呈妍攘別義

非同草菅猗猗長條拂簷端種植何必待張騫花開照眼  
憶去年歷遍榮枯至相關栽培成材開心顏仁見吐葩火  
流丹

感遇

雁塔生平志題名愧未酬風雲多會合日月易遷流數點  
英雄淚千莖鬢髮秋老當心益壯恐負伏波羞

秋風

颯颯吹偏急淒然不自禁天風何處發秋思此宵深結响  
來空際尋聲到樹林廬陵讀書客觸境正沈吟

過會盟城

此城距故向數里春秋所謂會于向是也今故址僅存土人猶呼爲會盟城云

千年盟會地遺址尙堪徵計里通吳晉循名介向鄩

城亦相近

城垣悲蔓草瓦礫驗田塍泐水橋西路行人不改稱

### 荀子墓

守正終遭廢蘭陵恨有餘書真成一子遇不異三閭片碣

荒苔沒孤封蔓草墟春秋隆墓祀賢尉意何如

縣佐劉公春秋致祭

### 晚至坊前村

望裏一孤樓依稀認舊游雲霞迷遠樹風露接清秋入室

人何在

曾同易彥二堂姪讀書於此今皆云亡

臨溪水自流挑鐙宵不寐蟲



語助悲秋

冒雨

課農來原野細雨散濛濛秋色浮遠岫雲容帶斷虹披蓑  
樵客狀墊角古人風清淺池中水蓮房墜粉紅

到鄧王山

撲面風來乍作涼鄧王臺上鬱蒼蒼流雲滃散嵐浮白淡  
日斜烘樹染黃滿眼翠微新雨過無邊秋色晚霞長山翁  
相約籬根坐扁豆花開一架香

驚秋

日月雙丸跳流光易逝驚秋風欺落葉寒露老蟬聲投筆  
班生志彈冠貢客情不堪重對鏡白雪鬢毛生

過芙蓉村

族姪克勤克友居此一年之中相繼淪沒過之愴然

未渡長橋

村西臨橋

恨已生悠悠流水最無情隄邊楊柳牽愁

緒岸外寒蟬曳慘聲十里青山

村后接山

斜日冷數椽茅屋暮

雲平西風惆悵人何在悲切予心汝弟兄

到莊陽北樓

時岳翁樞猶在堂

叢樓一望最傷心地是人非思不禁階下猶餘新發竹庭  
中那有未亡琴鑪煙暗裊香常熱素幕高張晝亦陰悵望

老人今已矣孤村幾處起清砧

孝感泉懷古

爲晉王大保臥鯉處嚴冬無冰亦一異也

琅邪雅望推西晉故址名泉信足徵在昔至誠曾躍鯉於

今孝感不成冰三冬已作春流渙一席長留暖氣蒸味美

青蒲王氏筍前人樹德後人承

河中蒲筍最佳王氏世傳其利

旣望對月有感

秋日去漸多  
舉簾對晚景  
涼月上東牆  
費我久引領  
微減三分圓  
明輝仍炯炯  
桂樹高扶疏  
依稀輪中影  
滿後須防虧  
遙望發深省  
湛露滴有聲  
松陰圓鶴警  
憶昔濟南游  
旣

夕駕小艇超然北極臺坐覽湖百頃鵲華矗北偏蔥秀壓  
諸嶺名士足唱酬夜色出塵境後會知何年渺渺風煙冷

野老歎

秋色連四圍爽氣澄西顥偶從阡陌游痴僂誰家老相近  
儼相識耳聾嫌聲小欲作竟刻談共坐依荒草問翁何處  
來種麥湖之表自言農家流稼穡以爲寶今歲不逢辰孳  
蝗食禾稻莠豆早靡遺戶戶滌場早倉中無餘糧播遷不  
可保涼風增暮寒贖衣恨錢少昨日吏到門催租作速了  
公私兩相迫百計無一好語語聽酸辛怒焉心如擣

延師

負笈憐年少延師得所宗  
執經虛似竹答問妙如鐘  
桃李春風暖芝蘭雨露濃  
束脩欣有誨絳帳待高蹤

夜讀聲

獨步空庭夜景清西樓殘月一鉤橫  
銅壺滴漏經頻轉隔院猶聞課讀聲

暮春廿二日衡家樓口塞志喜

崑崙萬里出潼關衝決多逢曠野閒  
故道人遷思北注狂瀾立挽任東還  
又安應許追前績泛濫從知少後艱  
河伯

效靈

宸慮慰桃花浪靜息潺湲

接王默亭京簡

風景依依各一方感深郵寄費商量言皆借箸籌何備氣  
本如蘭字亦香征馬聲高思冀北飛鴻羽便到沂陽多君  
肯赴三秋約共醉茱萸看菊黃

西湖有感

有敘

卽漁溝湖也北界孤山爲山水所匯西南兩道交  
流積久不涸頻歲苦旱中坦成途行人絡繹亦僅

事也過之感賦

悵望長湖數里遙  
行人何處問瀟瀟  
西來未沒雙流堰  
北去空餘五座橋  
白鳥羣飛歸別浦  
汙萊全闢種禾苗  
孤山卓立依然是  
止水無源易長消

向城小酌

不向公堂市足音  
偶憑道義結同心  
賦詩贈答惟官冷  
酌酒殷勤入夜深  
疏落性情新筆格  
別駕唐公善書朦朧月色半天陰  
雄談驚座推賢幕  
腹笥便便貯古今  
幕友王生談士也

寄李湘圃

歷下風光滯宰星白華致養守前經孤舟獨釣明湖月盡  
日貪看鵲岫青每遇好花先得句時逢名士必傾瓶陶然  
自得非忘世暫息賢勞事過庭

爲清澤二兄歸田作

宦海風波誰與爭歸來佳製續淵明無官羈足身方穩有  
子傳經氣亦平四壁圖書先世澤十年琴鶴舊時情黃堂  
高祿吾鄉少莫指台端望

玉京

入山



健步尋幽徑豪情未肯降山深雲作幙水淺石爲砒灌木  
聽鳴鳥疏籬隱吠龍盤桓不能去明月燦銀缸

買茉莉花

旋謝旋開歷日長雅憑素質壓羣芳詩情暗逐清風動閒  
玩江南幾瓣香

雨後北山卽境

雨餘愛翠微言躋山之麓灑灑响流泉森森列喬木蔓草  
與蒼苔相映共成綠坦處有人家炊煙上茅屋日常一經  
過是我先人築老翁倒屣迎祖褐無拘束汲水煮新茗不

比行潦濁自言逢歲荒愧乏旨甘蓄尊中餘沽酒釜內富  
野菽願得須臾留敢以供羹粥厚意豈容忘心與清景逐  
款言謝主人健步越牆曲興高氣亦適有徑剛容足振衣  
凌絕頂萬象森在目謝傅真風流游覽每信宿前賢不可  
作日月若轉燭四顧心茫然何處尋芳躅忽聽唱樵歌渺  
渺隔空谷

喜楊靜涵來

都門聚首歷有年三更鐙火尙依然日月雙跳入易老回  
首景物隔雲煙居處與偕飲食共兩兩夙結翰墨緣何期

身名同不遂或走風塵或歸田自歎仕途多阻滯君亦際  
遇會迤邐鍵戶不與家國事終歲睽違路漫漫月夕花朝  
苦相憶惟將情愫寄詩篇展箋欲寫詞未就款門有客驚  
出延相見始恨相遇疏執手無言心事傳家有斗酒不須  
沽脫粟蔬菜好加餐潔沐捧卮爲君壽人生一醉結百歡  
君飲我過修竹徑我歌君和夕陽天怲怲壯志終難抑自  
古華鬢勝朱顏上林苑中誰借牧渭水河側曾垂竿劃然  
長嘯清風動科頭斜倚曲闌干

閱蘇詩

少陵而後大蘇生有宋騷壇獨擅名祇以疏狂爲世忌須  
知忠愛本天成開編莫誤梅溪註掩卷如聞水調聲月到  
中秋題不得瓊樓高處最關情

戲贈杜畫工

賦詩愧才短飲酒慚量窮成名專一藝計無如畫工古人  
不可作今人將誰從有客款門告杖荷雨筠籠形癯步自  
健知是橫山翁夙亦世家子落魄走西東下筆求生活丹  
青寄萍蹤訪以舊時業竦肩樂融融繪水發浩瀚繪山象  
龍從繪獸骨相奇繪鳥羽毛豐人物與花卉枝扶而態濃

去取由君好歷歷善形容我聽翁言啞然笑若子之畫徒  
形肖在昔名家代有人專精無二故入妙誇多不值一文  
錢任意烘染只取闊盛氣立肖面如灰但道願受失言罰  
三杯

遇雨

鎮日兀坐無聊賴望空咄咄怨雨大衝泥散步立橋東隱  
隱青山三里外扶筇攝屐覺行遲頭上黑雲正催詩七字  
未成身先溼卻卻葛衫倩風吹

憶北行人將歸

長安道上走輕車千里雲山應憶家庭鳥今朝傳好語屏  
鐙昨夜結重花滌瓶滿貯蘭陵酒盥手親煎蒙頂茶歲事  
歸來多逸興殷勤爲我說

京華

夏日與舍弟閒居偶成

箕踞科頭不世情杜門謝客少逢迎樂輪館穀年年納無  
價書田歲歲耕詩意偶隨雲意動鑪煙適逐茶煙生怡怡  
相對堪終日窗竹搖風暑氣清

讀石湖詩有感

半生羈宦走西東風景同歸吟咏中舊隱石湖徒繫念插  
秧樂事付鄰翁

早行

凌晨得得趁微涼惆悵伊人水一方野雀爭喧禾稼熟天  
風遙動豆花香橋成壘石剛通步車過橫流幾沒箱爲語  
僕夫勤策馬飛飛雨腳到前莊

七月初一日卽境

大火仍昏中夷則將應律計月夏已週按節秋未立一夕  
發清涼西風吹瑟瑟乍入快活天晨起慵沐櫛灌我庭前

菊擇我盆中。掃修竹。自弄影。荷花帶露。溼口吟淵明詩身。  
無維摩疾。陶然甚。自得心安身。亦逸。俄聞叱牛聲。村村登  
穀。急扶筇。到前場。黍稷先開室。鄰翁席地談歲樂。逢今日。  
烹羊共炮羔。田功何日畢。國賦宜早完。訂期納秸。秬歸齋。  
閒無人濁醪。時一吸。

送人省試有感

檢點行囊飽貯書。槐花一度影扶疏。誰知見獵心仍喜。竊  
笑爭名瘡未除。售世文章聊復爾。封侯骨相竟何如。陶然  
自得多真趣。一卷南華信起予。



秋日閒居偶成二首

新涼天氣破愁顏  
農務殷繁自閒關  
飲酒賦詩從所好  
租衣脫帽只因閒  
蝶穿花徑深深過  
鶴戀松陰款款還  
客至呼童惟赤足  
鄉居風味不辭慳

唧唧蛩聲夜未闌  
倚牀不寐思無端  
偶成詩句羞雞肋  
閒著茶經笑馬肝  
陶徑月明松影靜  
梁園日暮柳煙寒  
漆園妙諦須潛會  
一卷南華子細看

村舍

秋色淡羣峰  
香花帶露濃  
牆高遲見月  
寺遠暮聞鐘  
好詠

幾成癖貪眠不避慵羨門何處是翹首憶仙蹤

買宅

無限興衰意蒼茫古寺西登樓尋故檻整壁換新題花發

當階桂

宅有春桂甚盛

鳴聽隔院雞

宅四面皆人家

莫驚梁上燕依舊自

銜泥

城寓

卜宅荒城角來游不計年牆垣存舊址松竹結新緣埽徑  
苔餘綠烹茶突上煙清礎何處起向晚未安眠

客來

甘載同心友相逢意興豪何人羞製錦我輩類藏刀坐久  
窗風透談深夜月高願君無惜醉勉進此醕醪

### 堂上宴

因事躋公堂率履未爲失邑侯最豪爽相見每造膝當晚  
開華筵鐙燭燦星日梨園爭獻技清歌徹琴室紛紜羅酒  
漿飲啖餘芬飴更進相爲壽威儀何抑抑主賓兩殷勤夜  
深未許出有吏捧文來啟緘動顏色向空作咄咄怛焉意  
慘惻少閒復入席言適奉上飭今年秋成好平糴屬乃職  
諸君四民首勉強各盡力崇朝須奉行期迫納秸稈坐客

默無言余亦暗歎息比年逢不登十家九菜食稱貸與逋  
欠公私動盈億典衣未及贖租稅催已急兩征若并行滌  
場無一粒竭我困中藏輸作倉廩食樂歲少宿飽餓殍煩  
宸卹

下寺銀杏樹歌

老樹亭亭不計年雙株高偃梵宮前每逢盛夏盤石坐南  
薰拂拂別有天濃陰作蔭苔痕綠脫帽露頂絕拘束游蝶  
栩栩清蟬鳴時喚老僧共棋局暑去寒來致不同一切繁  
華蕩西風落葉滿地無人埽離離垂實晚日烘閱盡榮枯

心如擣草木豈有四時好青青惟餘階下松後凋何嫌知非早

題鵲華秋色圖

濟南名迹不勝收快意登臨憶舊游  
歷下遙分岱嶽秀東偏兩峰接素秋  
卓立最愛華不注鵲壁高矗翠欲流  
落日返照發清冷蒼松紅葉互弄影  
取飲於今留寒泉燒丹自昔開仙境  
時從北極臺上望參差雉堞露雙頂  
憑將山色入畫圖有客援筆妙形摹  
涼煙漠漠生絹素披覽猶覺興不孤  
何當乘鶴凌絕巘渺渺身在白雲區

聞宋給事沛青歸養

獻替惟君事陳情賦遂初采華行已志解組愛吾廬畿道  
停驄馬秋河富鯉魚文章傳舊業庭著老萊書

十月送友人南還

北雁聯翩過南帆次第回君歸何迅速我意獨徘徊更賦  
詩三月還傾酒一杯山行應見憶處處早梅開

夜守諸子讀書

圍鑪危坐暗移情煎就新茶可解醒謝卻塵緣惟靜夜屢  
聽不厭是書聲梅香隱隱風初動松影迢迢霜正清往復

誰知燒燭短遙聞街鼓報三更

寄宋小嵐

荏苒流光迅似馳敢將疏散寄心知  
與人從厚非求報生子能狂猶勝癡  
文到得心輒朗誦書逢難解只存疑  
鹽車一脫增聲價且喜王楊早遇時

再過清泉寺

清泉一曲抱荒菴閱歲重來地最諳  
斜徑遙通村圃外人煙近隔小橋南  
拭碑認字千年古

寺有隋碑

汲水烹茶一味甘

何得高僧明解脫同翻貝葉證瞿曇

將入滇示子姪輩

愧乏良言遺汝行殷勤訓示意深長看明天理好無後聞  
遍人情謙有光再食常周惟蔬粟千年不斷是書香角弓  
偏反昭前鑒行葦欣歌第一章

順河早發

嘉慶乙丑十  
二月赴滇

三更未寐已開船順水河中蕩曉煙應是登程曾有約早  
來不惜杖頭錢

過牛鼻灘

一曲高灘灩澦中諺傳牛鼻訝相同衝波自有回瀾力順



水年年只向東

德山晴望

新晴景色破蒼茫極目閒雲雁幾行不斷春山青似黛浮  
圖高處認斜陽

舟抵常德

荆湖盤輦地要鎮舊知名渡濶人如市樓高水近城一河  
通上下列艇看分明到此須停泊前途再議程

晚泊

臨沅門外賽星羅鐙炬輝煌入望多夜色空濛人未睡隔

牆四面聽荆歌

小住

馳驅得効

聖恩覃水路縈紆夙未諳千里煙波來楚北一天風雨到  
湖南婆娑竹影青連岸靉靆雲客翠滿嵐自愧遠方無素  
識閒情散步訪僧菴

過桃源洞

花落花開不計春高亭翼翼映江脣洞中日月隔塵境莫  
向桃源誤問津

水急

聒耳聽揚波風帆不易過天光開霽少水氣作陰多勢逼  
山爲岸聲喧石作渦松杉千萬樹盡日弄婆娑

聽畫眉

擇地營巢不後時荆南暖意鳥先知千竿竹裏春風動處  
處青山踞畫眉

過滄浪灘

歷遍江湖不知難逢人先問滄浪灘行過桃源兩岸山隱  
隱綠水流中間秀筍林立石踞盤風水磨蕩響潺湲迴旋

磅礴作狂瀾圓珠濺噴滿闌干逆流直上各抱杆尺寸不  
踰心力殫平立艙門子細看忽聽樹外鳥聲歡逝者如斯  
興未闌坐對前峰解心顏

硃砂磯晚泊

一灣盤石映桃花色色可人非浪誇行近仙源客小住夕  
陽明處采丹砂

舟中卽境

遙看綠樹連隱隱上炊煙牆宇依山立藩籬借竹編伐杉  
深澗外采藥白雲邊忽聽鳴金鼓苗民正力田

晴日江行

麗日照春江百里不斷綠風水渙爲文溶溶漾似縠松杉  
連兩岸懸崖下飛瀑極目送行雲嵐光青若沐漁歌三兩  
聲繞過前山麓身在鏡中游竟日看不足

山村

山逼水環牛或一見馬不  
多有偶過此村賦以志之

門前水自流偶過羨居幽人語泉爭響炊煙霧共浮草青  
宜牧馬日夕甫歸牛無限山棲意春深事力疇

沽酒

三杯堪解悶入望盡桃花隱隱青帘動多因是酒家

喚風

舟行如駛借誰催一卷輕帆快乍開  
歷歷日簫吹不住可曾喚得順風來

過黔陽縣

山勢忽開平憑高卽建城人煙看輻輳樓堞望分明  
地僻刑書少時和吏治清龍標書院臨河宏化育願得訪諸生

入貴州界

歷遍江湖路遙遙一艦通畫疆分近遠導水辨西東  
岸草連新綠溪花照舊紅前途占海至游泳到黔中

兒茶晚泊

舟子兩相呼蠻音聽未了依稀說過灘欲渡須天曉

曉發偶成

太平真有象極目賞春華闢地除山蔓排河走水車香風  
生菜徑紅雨落桃花耕鑿勤農事苗民靜不譁

抵鎮遠府下船

屈指計行期此船何時駐十里鎮遠城卽是交卸處山川

相糾葛隱隱隔雲樹橋長擬駕虹

橋橫河中  
船行其下

畫舫挨次渡

須臾濟前岸帆停若碁布庶幾得所歸舍舟且徐步相去

不數武沿岸列客寓款門肅將迎殷勤勝積素攝衣上高樓徘徊聊四顧白雲出洞口洞在河側遠山一角露三杯共笑言薄醉日將暮西南小徑通達瀕由此路寄語賢主人夫馬莫余悞

黃平州賦所見

嫣然一笑燦煙霞記過黃平第幾家點染春光無限好隔牆新放小桃花

逢寒食有感

一色杏花開欲遍節逢寒食暗消魂可憐萬里懷鄉淚灑



向荒山看紙旛

黔俗清明日墓插紙旛

### 安順府偶成

款關緩步對斜暉  
安順來游興不違  
山大每因形水小  
苗多未免見民稀  
嘗新此日嘗新豌豆  
有約驚期早  
朋飲無妨喜價微  
自顧囊金行欲盡  
呼奴爲我典冬衣

### 易隆道中

朦朧曉日映窗紗  
一帶平夷入望賒  
郁郁香風凝不散  
沿溪開遍小桃花

### 關嶺武侯手植松

物與人俱壽南邦頌臥龍當年留手澤此地長喬松  
濤挾風霜厲青涵雨露濃鬼神司守護翠蓋影重重

楊林驛晚憩

備錄留參細不遺長程萬里付新詩連朝自笑匆忙甚  
野館青鐙續竹枝

鶴曉春豔

安甯州十二景之一○白鶴山下  
每春時杜鵑花開如錦色絢溪流

白鶴高凌雲漢春風吹放杜鵑十里花明似錦  
逢人立  
釣船

妙香齋詩集卷二終